

Naternami ukiuunerani januar 2012-imi aallartittumik umimmanniarartoqartalernissaanik Naalakkersuisut peqquneqarnissaanik Inatsisartut aalajangiiffigisassaattut siunnersuut.
(Inatsisartuni ilaasortaq Kristian Jeremiassen, Siumut)

Akissuteqaat

(Aalisarnermut, Piniarnermut Nunalerinermullu Naalakkersuisoq)

Siullermeerneqarnera

Inatsisartunut ilaasortaq Kristian Jeremiassen aalajangiiffigisassatut siunnersuummini allappoq, Naternami piffissaq umimmanniarfiusoq 1. augustip - 15. novembarip tungaanut piffissaliusaaq sivikippallaartoq. Taamaattumillu pisassiissutit 120-usut, ukiuuneranittaaq inuussutissarsiutigalugu sunngiffimmilu piniartartunit pisarineqarsinnaasariaqaraluartut. Siunnersuutip pisassiissutit annertussusaat allangortinngikkaluarlugu piniarnissamut piffissamik sivitsuinnissaq isumannaassagaa, aamma ukiakkut umimmaat pisarineqanngitsut ukiup ingerlanerani pisarineqarsinnaanissaat isumannaassagaa, Kristian Jeremiassen isumaqarpoq.

Paatsuisoqaqqunagu erseqqissassavara, Naternami umimmanniarnermut piffissaliusaaq aalajangersarneqarsimasoq tassaammat 1. august - 15. oktober 2011. Aamma erseqqissassavara pisassarititaasut katillugit 135-iummata. Pisassiissutaasunit taakkunannga umimmaat 15-it akiliisitsilluni piniartitsisartunut immikkoortitaapput. Taamaattoq umimmaat taamaallaat 3-t akiliisitsilluni piniartitsisartunut tunniunneqarsimapput sinnerilu inuussutissarsiutigalugu sunngiffimmilu piniartartunut agguanneqarnikuullutik.

Umimmaat illersugaanerat piniagaanerallu pillugit nalunaarutit malillugit ukiukkut umimmanniarsinnaaneq periarfissaareerpoq, taamaattumik inatsisitigut periarfissarinneqartut eqqarsaatigalugit Naternami ukiukkut umimmanniarsinnaaneq akornutissaqanngilaq. Qaasuitsup Kommuniata aqutsiveqarfiit iluini umimmannut pisassiissutit tamarmiusut 135-nik amerlassuseqartut aasakkut, ukiukkut aamma ukiukkut piniarnermut agguassinnaavai.

Maannakkulli pisassiissutaasut imatut annertussuseqarput pisassarititat tamarmik aasaanerani ukiaaneranilu pisarineqartarlutik, Pinngortitaleriffimmu pisanik nalunaarutiginnittarneq naapertorlugit. Naternamut pisassiissutit uumasut amerlassutsimikkut amerlanngitsuneersuusunit pisassiissutaapput, aqutsiveqarfinnut annertungaatsiartunut tallimanut agguanneqarsimasut. Tamakkua saniatigut umimmaat piaqqiorfiisa neriniarfiisalu nalaanni akornusersorneqarnerat minnerpaaffissaaminiitinniarneqassaaq, aalajangiinissamut siunnersuut akuersarneqassappat tamanna anguneqarsinnaanngilaq.

Sumiiffinni allani ukiukkut piniarfiusartuni pisassiissutit annertunerupput, umimmaallu amerlassusaasa annertusivallaarnissaat pinngitsoortinniarlugu ukiukkut piniartarneq pisariaqartinneqarpoq.

Taamalu Naalakkersuisut isumaqarput Naternami pisassiissutit tamarmiusut 135-nik amerlassuseqartut Aasiaat, Qasigiannugit, Kangaatsiap, Ilulissat Qeqertarsuullu aqutsiveqarfiini inuussutissarsiutigalugu sunngiffimmilu piniartartunut kiisalu tammajuitsussarsiorluni piniartitsinermik aqqissuussisartunut agguanneqarsimasut, Qaasuitsup Kommunianita nammineq aalajangiiffigisagaa aqullugillu kiisalu piujuartitsinermik tunngaveqarluni pisassiissutit innersuussutigineqartut iluanni pissasoq.

Taamaattumik siunnersuutip Qaasuitsup Kommunanut ingerlateqqinneqarnissaa inassutigineqarpoq.

Pissutsit qulaani eqqartorneqartut tunngavigalugit Naalakkersuisut siunnersuut tapersorsorniingilaat.

Matumuuna siunnersuut Inatsisartunut suliarisassanngorlugu ingerlateqqippara.